

Høyringsvar frå Aurland kommune til NOU 2022:20 – «Et helhetlig skattesystem»

Det vert synt til høyringsbrev frå Finansdepartementet datert 19.12.2022.

Aurland kommune er ein kommune i Indre Sogn med 1771 innbyggjarar og eit areal på 1467,7km². Me er ein typisk naturressurskommune med eit lite folketal, men med eit stort landareal å forvalte. Me er vertskap for ei enorm vasskraftutbygging som vart sett i gong i 1969 av noverande Hafslund Eco. 37 Fjellvatn var med i utbygginga. Det vart bygd 11 demningar og 11 bekkeinntak. Fem kraftverk stod ferdig i 1989 og produserte til saman 2,6 TWh.

Aurland kommune sluttar seg til høyringsuttale frå Landssamanslutninga av Vasskraftkommunar (LVK).

På lik linje med LVK, finn Aurland kommune det problematisk at Skatteutvalet syner til kraftskatteutvalet sin NOU 2019:16 (Sanderud), der det vart teke til orde for å skrote Konsesjonskraftordninga.

Vertskapskommunane sine konsesjonskraftinntekter (konsesjonskraft og konsesjonsavgift) i tillegg til inntekter frå naturressursskatt og eigedomsskatt ikkje ein vanleg skatteinntekt, men eit vederlag for tapte naturressursar og ulemper med utbygging. Å rokke ved dette representerer eit brot med ein over hundre år gamal samfunnskontrakt mellom staten, vasskraftkonsesjonærane og kommunane.

Aurland kommune, til liks med mange andre distriktskommunar, fører ein evig kamp mot sentraliseringsbølga. Aurland er ein av få distriktskommunar som har klart rimeleg godt å halde folketalutviklinga positiv. Det er dyrt å drive ein kommune med få innbyggjarar spreidd over eit stort areal. Vår rettmessige del av verdiskapinga gjer at me får det økonomiske handlingsrommet til å kunne halde infrastruktur og velferda oppe og gjere det attraktivt å busette seg her. Dette er den samfunnskontrakten som innbyggjarane tok innover seg når det vart gjeve løyve til å bygge ut fjella våre. Denne samfunnskontrakten er like levande i alle Aurlendingar den dag i dag.

Aurland kommune sa ja til eit evigvarande og irreversibelt naturinngrep mot at me fekk eit lovbestemt vederlag. Det låg aldri i korta at denne skulle annullerast, men det er det som i prinsippet skjer om dei feilslåtte ideane frå Sanderudutvalet vert realiserte, no eller seinare. Me vil sende eit sterkt signal om at me forventar at samfunnskontrakten mellom vertskommunane og storsamfunnet vert halde i hevd og at staten vernar om vårt lovbestemte vederlag.

Trygve Skjerdal

Ordførar

Aurland kommune

